



Rapport annual 2016

Preziadas commembras, preziai commembers

Sin giavisch da plirs participonts dil viadi a Morgarten havein nus organisau all'entschatta digl onn in apero da Daniev. Stai envidai ein gl'entir pievel da Vrin ed ils hosps da vacanzas. La sala el hotel Péz Terri ei beingleiti stada emplenida. Sco ins ha udiu, sentiu ed intervegniu han giuven e vegl schau gustar quei ch'ei vegniu offeriu e gudiu enzacontas uras en buna cumpignia.

L'usitada tura da commembers dils 15 d'uost ha giu liug ella vischinonza da nies vitg. 47 participonts ein vegni a Cava da Punt. Suenten la grillada preparada cun plascher dal mazler da Vrin, Hermann Huldi, havein nus fatg ina spassegiada a Schareida, el liug nua che las restonzas dall'avdonza dalla famiglia da Martin Carell ein aunc oz veseivlas – suenter circa 240 onns. En connex cun la moda e maniera dal viver da quels immigrants en in liug isolau ha Silvio Caviezel schau reviver legendas, raquents e fatgs historics. Siu lungatg bein structuraus, cungiug cun humor ed attracziun ha effectuai gronda atenziun tier tuts presents.

Silvio e nossa cassiera Martina Caviezel, ch'ei stada l'inizianta da quei project, han elaborau ed ediu ina brochura cun in vast cuntegn ed illustrada cun fetg bialas fotografias. Ad els dus sauda in grond engraziament per lur engaschi e lur lavur.

Sco finiziu da nossa tura culturhistorica ein ils participonts danovamein seradunai a Cava da Punt tier caffè e petta, offeriu dall'uniun. Fatschas cuntentas ed in adia cun engraziament han tradiu che la sentupada ei stada gartegiada.

Ils 16 d'october ein tuts interessai da Vrin e d'ordeifer vegni envidai ad ina presentaziun pertuccont il svilup dalla scolaziun a Vrin naven dall'entschatta (ca.1652) entochen gl'onn da scola 1954/55. Gidau mei a realisar quei project ha Pieder Alig. El ha perfecziunau e copiau fotografias e documents vegls. Las fotografias dallas classas d'antruras cun las gliestas dils affons da scola exponidas vid la preit han cun effect da magnet tratg neutier las persunas entradas en sala. Il nunspitgau e grond interess per la causa ei staus impressiunts e dau a mi niev anim per la presentaziun.

Malgrad la fina bial'aura han circa 80 persunas passentau il suentermiezdi en casa da scola. Suenten la presentaziun accumpignada da miu commentari ha l'uniun purschiu in aperitif cun l'intenziun da star en cumpignia. Duront quei temps eis ei danovamein vegniu fatg stedi diever da contemplar veglias fotografias ed encurir: bab e mumma, tats e tattas, basats e basatas ni schizun sesez, sco era da sfegliar cudischs e carnets vegls da scola exponi per quei intent.

Occurrenzas allas qualas tuts avdents da Vrin ed ils hosps ein envidai animeschan adina puspei enqual persuna d'entrar ell'uniun Cuminonza Vrin. El decuors digl onn 2016 ein 5 commembers/bras entrai ed 11 extrai. Il factum da tontas exradas po per part esser l'obligaziun da pagament d'ina contribuziun annuala da commembradi ch'ei vegnida decidida alla davosa radunonza.

El decuors digl onn havein nus giu 4 sesidas da suprastonza. L'emprema ha adina liug ensemen cun la cumissiun Fondo Greina che presenta a nus las damondas da contribuziun e lur propostas. Pertuccont il conceder contribuziuns vegn decidiu comunablamein.

Sco finiziu engraziell jeu en emprema lingia a mes consuprastonts, Martina e Ronnie, per la buna collaboraziun.

En special engraziell a tuts ch'ei adina puspei prompts da porscher agid enten realisar programs e projects. En general separticipesch buca mo paucas persunas a nossas occurrenzas aschia ch'ei vala la peina da s'engaschar.

Plein optimissem mirel el futur e giavischel a noss'uniun ina cuminonza che sesprova da promover il beinstar dil pievel da Vrin e che lur giavischs e propostas anflien ina buna resonanza.

Vrin, ils 3 da mars 2017

la presidenta: Jovita Vincenz-Solèr